

HE TUHINGA PAKI

Te whakamāramatanga:

Ko te paki he raupapatanga mahi e whakamārama ana, e whakataki ana rānei i tētahi wheako, hei whakangahau hoki.

Te pūtake:

Ko te paki hei whakangahau, hei poapoa i te kaipānui mā te whakatakoto i tētahi mahi me te whai i taua mahi ki tōna teiteitanga, ki tōna whakataunga hoki.

Ngā momo paki:

E toru ngā momo paki, ko te **paki whakangahau**, ko te paki tūhono, me te paki whakamārama.

Te tapanga

Te whakatakinga

Te raupapatanga mahi

Te whakataunga

Te Kāinga o Koro

Kei te taha o te ngahere te kāinga o tōku koroua. He tata ki te whare e tū pōuriuri ana, e tū whakamataku ana ngā rākau teitei, ngā rākau mātotoru. Ki tōku koroua he oranga ngākau, he oranga tinana hoki tōna whare me te ngahere. Otirā, i a au e pakupaku ana, ki tāku titiro he weriweri tōna whare me te ngahere.

Kua kaumātua tōku koroua. He kiri kūwhewhewhewhe tōna, he kiwikiwi ōna makawe, he roa, he piko ōna matimati. Auē! Kāhore hoki ahau i kite i te pai o tōku koroua. I tētahi rangi ka mea mai tōku māmā me haere ahau ki te kāinga o tōku koroua noho ai mō ngā hararei. Tōku pōuri hoki, nā te mea kāhore a Māmā rāua ko Pāpā i te haere.

I haere ahau mā runga pahi. Nō tāku taenga atu ki te kāinga o Koro, i kite ahau i te tatari mai ia ki ahau. Ahakoa te mihi mai a Koro, ka mānuka tonu ahau. Kua tekau tau tōku koroua e noho ana ki tōna kāinga, ko ia anake. I te matenga atu o tōku kuia kāhore tonu tōku koroua i hiahia ki te hūnuku ki wāhi kē noho ai. I mea mai tōku māmā, ko te ngahere te tino oranga o Koro, ā, ki te hūnuku a Koro me hūnuku hoki te ngahere. Otirā, nā te tino rerekē o tēnei wāhi i tōku kāinga i te tāone ka pā te mokemoke ki a au.

He tawhito rawa atu te whare o Koro, kua maroke te peita, kua pirau ētahi o ngā papa o te pakitara. I ahau e tū ana i te mahau ka rongu ahau i te whare e ngakeke ana. Ka tutū ngā huruhuru i tōku kakī. I roto i te whare ka rongu ahau i ngā hoihoi rerekē, ānō nei i te kōrero mai te whare ki ahau. Auē, ka kaha ake tōku matakū me tōku hiahia hoki ki ōku mātua, engari nā te karakia a Koro, tau ana ahau. Taro ake, ka warea ahau e te moe.

Ao ake i te ata ka karanga mai a Koro, "Maranga, e Moko, ka haere tāua ki te ngahere. Kua waea mai tētahi, kua mamae te puku o tana tama. Haere mai, e Moko." Kātahi ka whakaaro ahau kua pōrangī pea tōku koroua. He aha tā māua mahi i roto i te ngahere? He aha māua e kore nei e haere ki te tāone ki te hoko rongoa? Nā te tere o Koro ki te hīkoi me te poto o ōku waewae, ka hīkoi a Koro, ka oma kē au i muri i a ia. Ka kite ahau i te hononga o Koro ki te ngahere. He rite ia ki te manu e rērere ana mai i tētahi rākau ki tētahi rākau.

Kāore i roa, kua pau te hau, ka pōturi haere au, ka tū. Auē, kua ngaro a Koro! Ka karanga atu, ka tīwaha atu ahau ki a Koro, engari ko tōku reo anake i hoki mai, i pāorooro mai. Ka patupatu ake tōku manawa. Kātahi ka ohorere ahau. Kua tau mai tētahi kohu mā. Ehara i te kohu pērā i tō te tāone, he kohu whai wairua kē. Matakū katoa ahau. Ka tioro atu ki a Koro.

Ka rongu ahau i te reo o tōku koroua ānō nei ko ngā rākau i te kōrero mai ki ōku taringa, "E Moko, e tū ki konā. Mā ngā rākau koe e awhi. Mā ngā pīwakawaka ahau e ārahi atu ki a koe. Kia tau, e Moko." Nā te whio o te hau i roto i ngā rau, me te tau o te kohu, he uaua te rongu me te kite atu, engari kāhore ahau i matakū nā tōku mōhio e hono ana te wairua o tōku koroua ki te ngahere. Ka tau tōku wairua, ka waiata au i tētahi o ngā waiata o tōku kura, "E tū kahikatea, hei whakapai ururoa. Awhi mai, awhi atu, tātou, tātou e." Kāore i roa, ka tae mai tōku koroua me ngā pīwakawaka e rērere ana. Ka hiki te kohu, ka tau te hau, ka awhi māi a Koro. "Ka pai, Moko, haramai. Ka haere tāua ki te mahi i te rongoa."

I te wā e tunu ana a Koro i te rongoa ka rongu ahau i te wairua aroha i roto i te whare. Mai i taua wā kua mōhio ahau he tino koroua tōku. He koroua hono tahi me te ngahere me tōna whare, me te tangata. Tata tonu te pakaru o tōku manawa i te aroha ki a ia.

Hei tautohu i te kaupapa o te taki.

Ka whakataki i te paki me ētahi āhuatanga o te wāhi, o ngā kiripuaki, me te mahi kei te haere ake.

Ka whakatakoto i te tīmatanga, i te tipu, me te teiteitanga o te mahi.

Ka whakaahuatia te whakataunga o te mahi.

Ngā āhuatanga reo

- Te reo peha → ... ka mānuka tonu ahau. (para 3)
Ka tutū ngā huruhuru i tōku kaki. (para 4)
- Tohu i te mahi a tētahi atu (te reo tautoru) → ... he weriweri **tōna** whare ... (para 1)
He kiri kūwhewhewhewhe **tōna**, he kiwikiwi **ōna** makawe, he roa, he piko **ōna** mati. (para 2)
... kāhore **a Māmā rāua ko Pāpā** i te haere. (para 2)
..., kua mamae te puku o **tana** tama. (para 5)
... i te aroha **ki a ia**. (para 8)
- Te reo tohu wāmua → Otirā, **i a au e pakupaku ana**, ... (para 1)
I te matenga atu o tōku kuia kāhore tonu ... (para 3)
Ao ake i te ata ka karanga mai ... (para 5)
- Te reo raupapa → **Taro ake**, ka warea ahau e te moe. (para 4)
Kātahi ka whakaaro ahau ... (para 5)
Kāore i roa, kua pau te hau, ka pōturi haere au, ka tū. (para 6)
Ka karanga atu, ka tiwaha atu, ... (para 6)
- Te reo tautahi → **Tōku** pōuri hoki, ... (para 2)
I haere **ahau** mā runga pahī. (para 3)
... ka pā te mokemoke ki **a au**. (para 3)
I **ahau** e tū ana ... (para 4)
Auē, ka kaha ake **tōku** matakū me **tōku** hiahia hoki ki **ōku** mātua, ... (para 4)
He aha **tā māua** mahi i roto i te ngahere? (para 5)
... he tino koroua **tōku**. (Para 8)
- Te whakawhiti kōrero → “E Moko, e tū ki konā. Mā ngā rākau koe e awahi. Mā ngā pīwakawaka ahau e ārahi atu ki a koe. Kia tau, e Moko.” (para 7)
- Te reo whakaahua → He tata ki te whare e **tū pōuriuri** ana, ... (para 1)
... e tū whakamataku ana ngā **rākau teitei**, ngā **rākau mātotoru**. (para 1)
He kiri kūwhewhewhewhe tōna, ... (para 2)
... **ka mānuka** tonu ahau. (para 3)
..., kua **maroke te peita**, ... (para 4)
Ka **hiki te kohu**, ka **tau te hau**, ... (para 7)

Ngā tohutoro

For further information about Written Narrative see:

Aronui (2008). He Manu Tuhituhi. *He Tuhinga Whakangahau: He Pukapuka Arataki i te Kaituhi*. pp. 8–26. Te Papa-i-oea: Aotearoa.

Aronui (2008). He Manu Tuhituhi. *He Kura Tuhituhi me He Manu Taketake: Te Pukapuka Aratohu mā te Kaiako*. “He Tuhinga Whakangahau.” pp. 159–183. Te Papa-i-oea: Aotearoa.

He mea waihanga mō tētahi kaupapa a Te Tāhuhu o te Mātauranga.

Mana pupuri © Te Karauna 2024
Pūmau te mana.

